



## Dobrota srca i pomoć unesrećenima (Meka)

Hatib: dr. Bender ibn Abdulaziz Belile

19. redžeb 1444. po Hidžri / 10. februar 2023.

Hvala Allahu, Onome Koji je jedini savršen i potpun, i Koji je visoko iznad toga da ima drugu i porodicu. Hvalim Ga i zahvaljujem Mu na nepresušnim blagodatima. Svjedočim da nema boga osim jedinog Allaha, Koji nema druga, Velikog i Uzvišenog, i svjedočim da je Muhammed, sallallahu alejhi ve sellem, Njegov rob i poslanik, visokih moralnih osobina, neka su na njega Allahova milost, spas i blagoslov, i na njegovu porodicu i ashabe, najbolje prijatelje i najplemenitiju porodicu, i na tabiine i sve one koji ih slijede u dobročinstvu dok traju dan i noć.

O ljudi, oporučujem sebi i vama bogobožnost. Bojte se Allaha, Allah vam se smilovao, i čuvajte se da vas ne obmanu lažna nada i puste želje, jer samo što niste napustili ovaj svijet. "O vjernici, Allaha se bojte, i neka svaki čovjek gleda šta je za sutra pripremio i Allaha se bojte jer On dobro zna šta radite." (El-Hašr, 18)

O muslimani, najvrednije i najdragocjenije u čovjeku je njegovo srce, ono je prvak i predvodnik ostatka tijela. Od njegove dobrote ovisi dobrota njegove vanjštine. Numan ibn Bešir, radijallahu anhu, prenosi da je Vjerovjesnik, sallallahu alejhi ve sellem, rekao: "Zaista u tijelu ima jedan organ, kada je on zdrav, zdravo je čitavo tijelo, a kada je on bolestan, bolesno je čitavo tijelo, a taj organ je srce." (Buhari i Muslim)

Srce je izvor snage, stanište duše i imana. Ono je predmet Božijeg posmatranja i zadovoljstva, i zalog svom vlasniku, ako ga sačuva, na Danu dolaska pred Gospodara, "na Dan kada neće nikakvo blago, a ni sinovi od koristi biti, samo će onaj koji Allahu srca čista dođe spašen biti" (Eš-Šuara, 88–89). Vjerovjesnik, sallallahu alejhi ve sellem, rekao je: "Allah ne gleda u vaše likove ni u vaše imetke, nego gleda u vaša srca i vaša djela." (Muslim)





O vjernici, obligatna je dužnost i veliko djelo kod Allaha vođenje brige o srcu, njegovo popravljjanje, čišćenje i čuvanje od svega što ga upropaštava. U tome je njegov uspjeh, spas, sreća i užitak. A šta je to užitak ako nije užitak srca? I šta je to patnja, ako nije patnja srca?

Postoji više načina brige o srcu i njegovog popravljjanja, a najvažniji je ihlas – iskrenost, vezivanje srca za Gospodara, u riječima i djelima, činjenju dobra i ostavljanju zla, i odricanju od svega mimo Njega.

Srce se može popraviti i izvršavanjem propisanih ibadeta, farzova, vadžiba i nafile, oni ga prosvjetljuju, glačaju, učvršćuju i osnažuju.

Nasuprot tome su nepokornost i grijesi, koji pomračuju srce, zavode ga, razbolijevaju i upropaštavaju. Poslanik, sallallahu alejhi ve sellem, rekao je: "Iskušenja će dolaziti na srce jedna za drugim kao što je satkana hasura, prut po prut. Na srcu koje ih prihvati ostavit će crnu tačku, a na onom koje ih odbije ostavit će bijelu, tako da će postojati dvije vrste srca: čisto kao glatki kamen kome smutnja neće moći naštetiti sve dok postoje nebesa i Zemlja i crno srce kao ispražnjen vrč, koje neće prepoznavati dobro niti će odbijati zlo, poznavat će samo strasti koje su ušle u njega." (Muslim)

O muslimani, spominjanje Allaha je "glačalo" za srce, duša koja mu daje život, svjetlost koja mu osvjetljava put. Zikr je za srce ono što je hrana za tijelo, i voda za biljke. Uzvišeni kaže: "... a srca se doista, kad se Allah spomene smiruju!" (Er-Ra'd, 28). Neki čovjek došao je kod Poslanika, sallallahu alejhi ve sellem, i rekao: "Allahov Poslaniče, ibadeti su se umnožili (tj. dobrovoljni ibadeti), pa me obavijesti o onome što bih mogao ustrajno činiti." Poslanik, sallallahu alejhi ve sellem, reče mu: "Neka tvoj jezik uvijek bude vlažan od spominjanja Allaha." (Ahmed i Tirmizi, hasen)

Ko učini grijeh, ili naumi učiniti grijeh, neka što više uči istigfar, jer njime se brišu grijesi i čisti srce. Uzvišeni kaže: "... i za one koji se, kada grijeh počine ili kad se prema sebi ogriješe, Allaha sjete i oprost za grijehne svoje zamole – a ko će oprostiti grijehne ako ne Allah? – i koji svjesno u grijehu ne ustraju." (Ali Imran, 135)





Vjerovjesnik, sallallahu alejhi ve sellem, rekao je: "Moje srce nekada obuzme zaborav, i zato tražim oprost od Allaha sto puta u jednom danu." (Muslim)

Kada se čovjek posveti Kur'anu, učeći ga, razmišljajući o njegovim porukama i postupajući po njegovim propisima, njegovo srce se raznježi i ispuni se dobrom i svjetlošću, a kako i ne bi kada je Allahova Knjiga uputa koja izvodi ljude iz zablude na Pravi put, i rastjeruje tmine neznanja, i ona je lijek od tjelesnih i srčanih bolesti i sigurnost u vjerskim i svjetovnim stvarima. "O ljudi, već vam je stigla pouka od Gospodara vašeg i lijek za vaša srca i uputstvo i milost vjernicima." (Junus, 57)

Bojte se Allaha, o ljudi, i znajte da čovjekov stepen i deredža kod Allaha zavise od života njegovog srca – koliko je živo njegovo srce, toliko je blizu svoga Gospodara, a koliko je tvrdo njegovo srce, toliko je udaljeno od Njega.

Uzvišeni kaže: "Gospodar vaš dobro zna šta je u dušama vašim: ako budete poslušni – pa, Allah će doista oprostiti onima koji se kaju." (El-Isra, 25)

O vjernici, Allah, džellešānuhu, ima očigledne dokaze i zadivljujuća i nadnaravna djela u kosmosu, koja svjedoče o veličini Stvoritelja i ljepoti stvaranja, i pozivaju na razmišljanje, posmatranje i čvrsto ubjeđenje. Zašto ne pogledate ovu zemlju, od koje ste stvoreni, na kojoj živite i gradite, i u čijoj se utrobi ukopavate? Allah je zemlju učinio vašom prostirkom, bešikom i prebivalištem, i na njoj je za vas odredio opskrbu i hranu kao blagodat i dobrotu od Njega, a zatim čini da se ona potrese, kao opomena i upozorenje.

Uzvišeni kaže: "Mi smo vas na Zemlji smjestili i na njoj vam sve što je potrebno za život dali. A kako vi malo zahvaljujete!" (El-A'raf, 10)

"Allah vam je učinio Zemlju prebivalištem." (Gafir, 64)

"On vam je Zemlju pogodnom učinio, pa hodajte predjelima njezinim i hranite se onim što On daje, Njemu ćete poslije oživljenja odgovarati." (El-Mulk, 15)

Potresanje zemlje je poziv srcima da se "potresu", razbude i opomenu nakon nemarnosti i tvrdoće, da veličaju Allaha, ponize se pred Njim, predaju Mu se i skruše i da ostave Njegove zabrane i traže Njegovo zadovoljstvo.





Ljudi su iznenađeni i zaprepašteni razornim i zastrašujućim zemljotresima koji su pogodili neke muslimanske zemlje (Tursku i Siriju). Hvala Allahu na onome što je odredio i dopustio da se desi. On iskušava dobrom i zlom, ispituje davanjem i uzimanjem i obećava onima koji se strpe Svoju milost, uputu i blagoslov. U svim iskušenjima i nedaćama kriju se Njegova neizmjerena mudrost i milost, i mi Ga molimo da one koji su pogođeni ovim zemljotresima zaštititi Svojom zaštitom i obuhvati ih Svojom milošću i dobročinstvom, da izliječi bolesne i ozlijeđene i smiluje se umrlima.

Allahu moj, smiluj se, spasi i blagoslovi Svoga Poslanika, njegovu porodicu i ashabe, i tabiine i one koji ih slijede u dobročinstvu do Dana povratka, i nas s njima, Svojom dobrotom i plemenitošću, o Plemeniti i Darežljivi.

Znajte da vam je Allah naredio da donosite salavate i selame na Njegovog Vjerovjesnika, pa je rekao u mudroj Objavi: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

Molim Allaha da i meni i vama podari blagoslov u časnom Kur'anu, i da podari da nam koriste njegovi ajeti i mudra opomena. Rekoh ovo i od Uzvišenog Allaha tražim oprost za sebe, za vas i sve muslimane od svakog grijeha, a tražite i vi, On mnogo prašta i On je milostiv.

